

Tur instancia concerni a actua rapidamente na forma cordina

Bon trabao a evita desastre den Centro di Playa

Cinco miembro di Cuerpo di Bombero mester a haya tratamento medico

ORANJESTAD(AAN)--
Na forma coordina y rapido, in-

stancianan concerni a drenta
den accion. Esaki a haci posible

pa Playa worde salba di un
desastre mayor y pa a salba un

cantidad di edificio den vecindario directo di La Hoja. E trabaonan no a bay sin maximo esfuerzo y ayera cinco miembro di Cuerpo di Bombero mester a haya tratamiento medico pa iritacion na wowo.

E cas di palo a scapa. Mes-cos a conta pa e refresqueria, botica, zapateria y hasta banco, cu a mira vlamnan yega cerca di su muraya. Accion rapido di Cuerpo di Bombero, Polis, WEB, Elmar y tur instancia concerni a haci cu por a evita un problema serio den Centro di Playa y cu henter un bloque di edificio lo a bay perdi.

Tabata tin varios aspecto relaciona cu e incendio. Na promer lugar tabata tin e peligro representa pa quimico y material peligroso cu tabata presente na La Hoja y na Botica. Material cu a manda huma, cu a causa iritacion di wowo cerca bomberonan y cinco di nan mester a haya tratamiento medico ayera.

Tambe tabata tin riesgo grandi pa e candela plama y e Director di Bombero, Ing. Juan

Lopez a splica ayera con mester a traha segun prioridad. Na promer lugar mester a mira si tabata tin bida na peligro. A resulta cu esey no tabata e caso. Despues mester a evita cu e candela ta plama, y esaki si tabata representa un amenaza serio. Cinco unidad di Cuerpo di Bombero a percursa pa evita plamamento exitosamente.


E incendio a tuma lugar na un momento cu no tabata tin casi publico ariba caya, loke a facilita ceramento di caya y tambe a evita multitud di mirones cu hopi biaha ta causa solamente molestia, pero ta insisti di para mira kico ta pasa. Na e momento tambe, no tabata tin trafico practicamente, loke a facilita yegada di e instancianan concerni na e sitio, mientras consumo di awa tabata hopi abao.

Ayera Cuerpo di Bombero a worde confronta cu peligro serio pa su miembronan pero tambe pa publico, ya cu e edificio por a basha abao cualquier momento.

Na un forma eficaz a worde traha pa asina a evita cu ayera Playa a registra un desastre enorme.



Zepp Wever ta contempla labornan di Cuerpo di Bombero, cu a evita plamamento di e vlamnan.....



Tin hende no kier tende ni kier mira peligro. Polis mester a aleha e persona aki di e sitio di candela....